



*Abram combat & surmonte cinq Roys : deliure Loth de captivité :  
Melchisedech offre pain & vin.*

**A**D VINT qu'Amraphel Roy de Sennar, & ses alliez Roys s'assemblerent en la vallée de Siden, en laquelle il y eut vn choc de bataille contre les Roys de Sodome & Gomorre, lesquels prindrent la fuite, dont furent les vns accablez, & les autres se sauuerent és montagnes. Ces Roys poursuiuans leur victoire prindrent Loth, fils du frere d'Abram, qui habitoit lors en Sodome, & l'enuoyerent captif avec tous ses biens : mais il eschappa vn de ses gens, qui annonça cette nouvelle à Abram Hebrieu, qui habitoit lors en Mambré. Lequel avec Escol & Aner ses alliez, equippa trois cens dix-huit des plus robustes de ses seruiteurs domestiques, & d'un grand courage poursuiuirent lesdits Roys en telle diligence, qu'ils furent deconfits, & Loth fut recours d'entre leurs mains en la vallée Royale. Lors Melchisedech aussi Roy de Salem, & grand Sacrificateur de Dieu souuerain, offrit pain & vin pour les victorieux, disant ; Benit soit Abram par le Dieu Tres haut, possesseur du Ciel & de la Terre : Et Abram luy donna la decime des dépouilles conquises. Le Roy de Sodome pria Abram qu'il prinst la conqueste des biens pour luy, & qu'il luy laissast les captifs de sa Nation. Mais Abram n'en voulust rien prendre, pour euiter le reproche d'auoir esté enrichy du bien d'autruy, horsmis seulement ce que ses gens auoient dépensé de viures.